

AWIG-AWIG
DESA ADAT BANGKYANG JARAN



DESA LALANGLINGGAH KECAMATAN SELEMADEG
KABUPATEN TABANAN
WARSA 2000

BANTANG AWIG-AWIG DESA ADAT BANGKYANG JARAN

Kaca

MURDHA CITTA	1
PRATHAMAS SARGAH ARAN LAN WEWIDANGAN	1
DWITIIYAS SARGAH PATITIS LAN PAMIKUKUH	2
TRTIYAS SARGAH SUKERTAN TATA PAKRAMAN	2
Palet 1 Indik Krama	2
Palet 2 Indik Prajuru lan Dulun Desa .	6
Palet 3 Indik Kulkul	8
Palet 4 Indik Paruman	9
Palet 5 Indik Druwen Desa	10
Palet 6 Sukerta Pamitegep	11
Kaping 1 Karang, Tegal, lan Carik	11
Kaping 2 Pepayonan	13
Kaping 3 Wewangunan	13
Kaping 4 Wewalungan	14
Kaping 5 Indik Bhaya	15
Kaping 6 Panyanggran Krama Desa	16
CATURTHAS SARGAH SUKERTAN TATA AGAMA	16
Palet 1 Indik Dewa Yajnya	16
Palet 2 Indik Resi Yajnya	19
Palet 3 Indik Pitra Yajnya	20
Palet 4 Indik Manusa Yajnya	23
Palet 5 Indik Bhuta Yajnya	24
PANCAMAS SARGAH SUKERTAN TATA PAWONGAN	24
Palet 1 Indik Pawiwahan	24
Palet 2 Indik Nyapihan	25
Palet 3 Indik Sentana	25
Palet 4 Indik Warisan	26
SASTHAMAS SARGAH WICARA LAN PAMIDANDA	26
Palet 1 Indik Wicara	26
Palet 2 Pamidanda	27
SAPTAMAS SARGAH NGUWAH-UWUHIN AWIG-AWIG	28
ASTAMAS SARGAH SAMAPTA	28
LEPIHAN : I NIASA LAN SASANTI DESA ADAT	
BANGKYANG JARAN	30
LEPIHAN : II PANITIA PANYURATAN AWIG-AWIG	
DESA ADAT BANGKYANG JARAN	31

MURDDHA CITTA

OM AWIGHNAM ASTU NAMA SIDDHAM !

Sembah bakti miwah pangastawan titiang majeng ring paduka Bhatara-Bhatari sesuwunan titiang sami, riantukan wantah malarapan panghyangning kalih paswecan Ida Sang Hyang Widhi Wasa asung kerta waranugraha nyrestri jagat jangkep rawuhing sadagingnya sami, mawinan wenten kahuripan sekala niskala ring Bhuwana Agung miwah ring Bhuwana Alit. Manut dresta, Desane kamanggehang dados pasayuban Krama Desa rawuhing kulawarga pawongannya sami, mawastu raris Desane kamanggehang pinaka pawakan Bhuwana Agung, pawongannya ka manggehang pinaka Bhuwana Alit.

Sotaning pawakan Bhuwana Agung, Desane taler kamanggehang pinaka pawakan bhawa mahurip, sane kacirenin antuk wentene pakilit Tri Hita Karana sane nenten dados pasahang, luwire :

- na. Parhyangan, sahanan parhyangan panyiwian Desa, genah ngarcana bhawan Ida Sang Parama Wisesa, pinaka jiwa Desane;
- na. Pawongan, gebogan Krama saha warga Desa makasami pinaka bayu pramanan Desane, mawinan Desane prasida maolah prawreti;
- ca. Palemahan, sahananing tanah kekuwuban wewidangan Desa, pinaka sthulan Desane.

Adung patemoning Bhuwana Agung ring Bhuwana Alit, maka larapan ngupadi santa jagadhita, punika sinanggeh murddhaning prayojana pangriptaning awig-awig iki, rikala paseban sami Krama Desa Bangkyang Jaran, pinaka sepat sepat siku-siku pamtut miwah pamutus wastu kasidan prayojanan sami kabeh, prasama angidep muwah amageh aken linging awig-awig kadi ring sor iki.

PRATHAMAS SARGAH

ARAN LAN WEWIDANGAN DESA

Pawos 1

- (1) Desa Adat puniki mawasta Desa Adat Bangkyang Jaran.
- (2) Jebar kekuwub wewidangannya, mawates nyatur desa :
 - na. Sisi Lor : Alas Tutupan.
 - na. Sisi Wetan : Alas Tutupan/Tukad Yeh Bakung.
 - ca. Sisi Kidul : Banjar Adat Yeh Bakung.
 - ra. Sisi Kulon : Pangkung Maceti.
- (3) Jebar kekuwub wewidangan sane kawengku antuk wates-wates inucap ring ajeng wenten : kirang langkung : 203,000 Ha.

- (4) Sane kamanggehang ngranjing dados kekuwub wewidangan Desa Adat puniki, manut dresta, luwire :
 ha. Pupulan karang paumahan sane sinanggeh Palemahan Desa Pakraman;
 na. Kahyangan, Setra, carik miwah tegal sane wenten ring kekuwub wewidangan Desa Adat puniki sajabaning Palemahan Desa Pakraman, manggeh ngranjing dados Tlajakan Desa Adat puniki.
- (5) Desa/Banjar puniki, kaepah dados tigang tempekan, luwire :
 ha. Tempekan Sandat;
 na. Tempekan Buwah;
 ca. Tempekan Kaliasean.
- (6) Awig-awig, Pararem miwah sahanan Pasuaran Desa, manggeh kajejerang ring jebat kekuwub wewidangan Desa Adat puniki sami,

DWITĪYAS SARGAH

PATITIS LAN PAMIKUKUH

Pawos 2

Desa Adat Bangkyang Jaran ngamanggehang pamikukuh, minakadi :

- (1) Pancasila;
- (2) Undang-Undang Dasar 1945, pamakas pasal 18;
- (3) Tri Hita Krana, manut sadācāra Agama Hindu.

Pawos 3

Luwir Patitis Desa Adat Bangkyang Jaran, inggih punika :

- (1) Mikukuhin miwah ngrajegang Sang Hyang Agama;
- (2) Nginggilang tata prawretine maagama;
- (3) Ngrajegang kasukertan Desa saha Pawongannya sekala lan niskala.

TRTĪYAS SARGAH

SUKERTAN TATA PAKRAMAN

Palet 1

Indik Krama

Pawos 4

- (1) Sahananing sang jenek mapumahan ring wewengkon wewidangan Desa Adat Bangkyang Jaran sinanggeh warga Desa.
- (2) Warga Desa inucap ring ajeng, linggihnyane wenten tigang soroh :
 ha. Warga Desa sane maagama Hindu tur sareng nyungkemin Kahyangan Desa Adat puniki sinanggeh Krama Desa Adat Bangkyang Jaran.
 na. Sajaba punika, sinanggeh Panumpang miwah Tamiu, sane kasulur-ang manut Prarem.

Dasar Pakraman :

- (1) Sahanan Warga Desa sane maagama Hindu tur sampun marabian, ngawit makrama Desa Adat.
- (2) Satunggil Krama, manut karendahan kulawargannya, patut keni sina-
lih tunggil ayah-ayah :
ha. Ayahan Ngarep;
na. Ayahan Balu.
- (3) Sesengker ngawit tedun ngayah :
ha. Marep ring Krama Desa sane mawit saking pawiwahan, tigang sa-
sih saking puput makala-kalan.
na. Marep ring Krama Desa sane mawit saking ngarangin, kasulurang
manut Pararem.
- (4) Krama Desa Ngarep sane wenang nyada yan sampun kapastika, luwire :
ha. Sungkan tahunan sane tan keneng tinamban;
na. Yan sampun maderbe pangentos utawi panyeledii;
ca. Yan yusannyane sampun lingsir, sane kasulurang manut pararem.
- (5) Kulawarga sane maagama Hindu sane mawit saking Desa Adat sewosan
prade pacang jenek linggih ring kekuwuban wewidangan Desa Adat
Bangkyang Jaran, wenang ngranjing dados Krama Desa Adat Bangkyang
Jaran, tur patut keni batu-batu utawi pamogpog, sane agengipun ka-
sulurang manut pararem.
- (6) Yan tan jenek linggih kadi ring ajeng, wenang ngranjing dados
Krama Panumpang.
- (7) Sang saking sewosan desa adat yan sareng tedun makrama desa uta-
wi numpang ring Desa Adat Bangkyang Jaran, patut atur supeksa
ring Bendesa Adat/Kelihan Adat, saha maduluran surat katerangan
sane jangkep.
- (8) Sulur miwah tata cara sareng ngranjing makrama desa utawi num-
pang ring Desa Adat Bangkyang Jaran, kasulurang manut pararem..
- (9). Sahanan Krama Desa Adat Bangkyang Jaran sane mawali saking
Transmigrasi, patut keni batu-batu utawi pamogpog, sane ageng
ipun kasulurang manut pararem.

Pawos 6

Wusan dados Krama Desa, luwire :

- (1) Sangkaning :
ha. seda;
na. pinunas ngraga, menawi mangingsir linggih saking wewengkon
Desa Adat Bangkyang Jaran;
ca. kanorayang, malantaran piwal ring daging awig-awig miwah Pa-
rarem Krama Desa, utawi tan satinut ring pituduh Prajuru sa-
jeroning indik nyupat sikian, minakadi nenten prasida ngeseh-
in prawreti;

ra. Tata-titine ngardi pamastika wusan dados Krama Desa inucap ring ajeng, kasulurang manut pararem.

- (2) Sang wusan Dados Krama Desa Adat Bangkyang Jaran tan polih pah-pahan Druwen Desa Adat Bangkyang Jaran, miwah tan polih pasayuban malih sajeroning hala hayu.

Pawos 7

Sahanan Krama Desa, patut keni tetegenan utawi ayah-ayah, luwire :

- (1) Ayahan Ngarep, mapiteges paturunan miwah ayahan memungkul saking Krama Ngarep.
- (2) Ayahan Balu, luwire :
- ha. Balu remban lanang utawi isri sane pianaknyane kantun alit-alit, keni peson-peson atenga.
- na. Balu ngelintik, keni ayah-ayah manut pararem.
- (3) Balu remban lanang utawi istri sane pianaknyane sampun munggah daa/truna, keni ayahan miwah peson-peson sawungkul.
- (4) Ritatkala ngardi wewangunan kabuwatan Desa Adat, Kramane sajaba keni ayahan manut pawos 7, taler keni paturunan sakadi ring sor :
- ha. Paturunan sama wibhaga, amnut pararem;
- na. Dana Punia, manut kalascaryan sang madana punia.
- (5) Krama Desa, kadaadosang :
- ha. Mapuangkid utawi tan tedun ngayah utawi parum :
- 1). Rikala mapawangunan, ngraabin, nangun yajnya, nandur, kaluwasan sengker dewasa;
 - 2). Keni dedawuhan saking Guru Wisesa;
 - 3). Kapiambeng, luwire : sungkan, matepetin, kalayusekaran, lan sakancan punika, sane kasulurang manut pararem.
- na. Dados ngwakilang ring jadma tiosan, sane sampun menek daa/truna, sane sampun pastika mayusa 17 warsa ngamunggahang.
- ca. Dados ngampel/mogpog utawi numbas ayahan, prade :
- 1). Dados Pegawai Negeri utawi Pegawai Swasta;
 - 2). Magenah ring desa sewosan malantaran ngrereh pakaryan;
 - 3). Pangampel/Pamogpog wenten kalih soroh, inggih punika : pangampel/pamogpog ayahan miwah pangampel/pamogpog peson-peson utawi paturunan.
 - 4). Pamutus tata cara numbas ayahan ring ajeng kasulurang manut pararem.
- ra. Dados nyeledii utawi nyuksukin Krama Ngarep yan sampun pastika mayusa 17 warsa ngamunggahang.

Pawos 8

Kapatutan Krama Panumpang/Tamiu :

- (1) Krama Panumpang/Tamiu, patut madana punia ring Desa Adat, manut pararem.
- (2) Krama Panumpang/Tamiu, patut polih pasayuban marupa pitulung ri kenjekan katiben pancabhaya.

Pawos 9

Ayahan Daa Truna :

- (1) Sahanan putra-putrin Krama Desa sane sampun mayusa 17 warsa ngamungahang, sowang-sowang patut tedun ngayah sane kawastanin ayahan truna miwah ayahan daa.
- (2) Ayahan daa truna inucap ring ajeng, kaenter miwah kapupulang antuk Kelihan Sekaa Truna.

Pawos 10

Unjuk Lungsur Krama Desa :

- (1) Unjuk lungsur Krama Desa miwah rerobahan sahananing ayah-ayah, kasulurang sakadi ring sor puniki :
 - ha. Unjuk lungsur Krama Ngarep mawali kaetang malih sanangken pangawit Sasih Kasanga.
 - na. Ayahan Balu miwah ngawit makrama desa marep ring krama desa sane mawit saking desa adat sewosan, kaetang pramangkin.
- (2) Sanangken ngetang unjuk lungsur Krama Desa miwah rerobahan ayah-ayah, Bendesa Adat patut ngamargiang cacah jiwa, sajeroning mastikayang gebogan pakraman ring wewengkon wewidangan Desa Adat Bangkyang Jaran.
- (3) Kapastikan cacah jiwa, pamekas indik gebogan pakraman miwah rerobahan ayah-ayah, kapikukuh antuk Paruman Krama Desa, kandugi prasida kalaksanayang.
- (4). Pamastika inucap ring ajeng, digelis kasurat jeroning Likita Krama Desa Adat Bangkyang Jaran.

Pawos 11

Paturunan miwah Leluputan :

- (1) Paturunan utawi peson-peson sajeroning ngulati kasukertan Desa Adat, kapitegenang ring Krama Desa, sane Kasulurang sakadi ring sor puniki :
 - ha. Krama Ngarep, keni sawungkul;
 - na. Krama Balu Remban sane pianaknyane kanton alit-alit, keni atenga;
 - ca. Krama Balu Remban sane pianaknyane sampun munggah daa truna, keni sawungkul;
 - ra. Krama Balu ngelintik, kasulurang manut pararem;
 - ka. Pangayah ubuh, kasulurang manut pararem.
- (2) Desane maweh leluputan ayah-ayah miwah peson-peson ring sang inggiling linggih miwah sang kawelasarsan.
- (3) Sor singgih leluputan miwah bacakan sang polih leluputan, kaungguhahang jeroning pararem.
- (4) Sajawaning Prajuru Desa, sane pastika taler polih leluputan, luwire :

ha. para sadhaka,minakadi Pamangku Kahyangan Desa,lan panyada;
 na. para serati lan sutri;
 ca. sang sungkan tahunan sane tan sida tinamban;
 ra. wong cedangga banget;
 ka. wong ubuh meme bapa,kasulurang manut pararem.

Pawos 12

Swadharman Krama Desa Adat Bangkyang Jaran :

- (1) Sahanan Krama Desa Adat Bangkyang Jaran,patut :
 ha. Dredha bhakti ring Desa Adat;
 na. Satinut ring daging Awig-awig;
 ca. Tatak ring kerti yasan Desa minakadi purun natakin panes tis kerti yasan Desa.
- (2) Warga Desa Adat sane manggeh dados Panumpang miwah Tamiu ring Desa Adat Bangkyang Jaran,patut satinut ring tetiwak Desa sajeroning ngupadi kasukertan Desa,tan kengin tungkas ring pamargin kerti yasan Desa Adat Bangkyang Jaran.
- (3) Sahanan Warga Desa Adat rawuhing sang sinanggeh Panumpang/Tamiu,wenang polih pasayuban sajeroning ngamanggehang kasukertan siki-an,agama,rawuhing druwenyane sowang-sowang.
- (4) Sahanan Warga Desa polih pasayuban utawi pangayoman manut dresta miwah kawenangan sajeroning :
 ha. Sangaskaran kahuripan sane mabuat minakadi sane mastikayang indik paiketan kulawargannyane.
 na. Kasukertan miwah kasucian sikian,parhyangan,miwah karang pamahannya sowang-sowang.

Palet 2

Indik Prajuru lan Dulun Desa

Pawos 13

- (1) Desa Adat Bangkyang Jaran kaenter antuk Prajuru Desa Adat,kamanggala antuk Bendesa Adat.
- (2) Banjar Adat kaenterang antuk Kelihan Adat,karombo antuk Juru Arah.
- (3) Tempekan kaenter antuk Kelihan Tempekan.
- (4) Prajuru Desa Adat/Banjar Adat,patut :
 ha. mawit saking Krama Ngarep;
 na. kaadegang Prajuru malantaran antuk pamilihan jeroning Paruman Krama Desa/Banjar,nyabran tigang warsa,sajawaning wenten pariindikan tios,tur sang sampun puputing panumaya,kengin kapilih malih;
 ca. maduluran atur piuning ring Pura Desa.

Pawos 14

- (1) Bendesa Adat,karombo antuk :
 ha. Panyade,pinaka wakil Bendesa Adat;

- na. Panyarikan, pinaka Juru Surat.
 - ca. Patengen, pinaka Pangemong Druwen Desa;
 - ra. Kelihan Adat pinaka pangenter Banjar Adat, sane karombo antuk Juru Arah, pinaka Juru Gumencang.
- (2) Sajeroning ngenterang kasukertan kaniskala, Bendesa Adat, patut misinggihang Pamangku Kahyangan Desa.
- (3) Prajuru Desa Adat taler ngadegang Dulun Desa utawi Panglingsir sane sinanggeh Kerta Desa, mawit saking Prajuru sane sampun pusing panumaya, sang wikan ring adat miwah agama, miwah sane lianan, sane kasulurang manut pararem.

Pawos 15

Sang patut kapilih kaadegang Prajuru Desa Adat, luwire :

- ha. Bhakti ring Ida Sang Hyang Widhi Wasa;
- na. Jujur miwah satia wacana;
- ca. Mayusa pinih kedik tigang dasa nem warsa, tur mawit saking Krama Ngarep;
- ra. Tan cedangga;
- ka. Uning masastra.

Pawos 16

- (1) Swadharmaning Bendesa Adat, luwire :
- ha. Ngenterang paruman-paruman Desa/Banjar;
 - na. Ngenterang panglaksanaan sadaging Awig-awig miwah pamutus-pamutus Krama Desa/Banjar, sane sinanggeh Pararem;
 - ca. Ngraksa miwah nudonang tata-titine migunayang sarajabrana druwen Desa;
 - ra. Nuntun saha ngenterang Krama Desa rawuhing Warga Desa sami, sajeroning ngupadi kasukertan sekala lan niskala;
 - ka. Nuntun saha nyaksi upacara sangaskaraning kahuripan sane mabuat, minakadi sane ngilitang sulur pakulawargan;
 - da. Nuntun saha ngenterang Warga Desa nginggilang Sang Hyang Agama, kasucian Kahyangan, kasucian Palemahan, kasucian Pawongan, miwah tata-titine migunayang Setra;
 - ta. Mawosin miwah niwakang pamutus marep ring wicaran Warga Desa;
 - sa. Ngwakilin Desa/Banjar, matemuang bebawos ring sapa sira ugi;
 - wa. Lan sane sewosan sane wenten pakilitnya ring Desa/Banjar.
- (2) Tata-titine nglaksanayang swadharma inucap ring ajeng, tan maren patut satinut ring daging Awig-awig, Pararem, Dresta miwah Pamutus Paruman Krama Desa/Banjar.
- (3) Panglaksanane ring ajeng patut kasiarang ring Desa/Banjar, kapungkuripun.
- (4) Sumakuta utawi sumanggup natak pamutus Paruman Krama Desa/Banjar, majeng ring swadharman sowang-sowang Prajuru.
- (5) Prade Prajuru iwang panglaksana, patut keni pamidanda sane kasulurang manut pararem.

Pawos 17

Patias utawi olih-olihan Prajuru/Dulun Desa,luwire :

- ha. luput reramon utawi peson-peson;
- na. luput paturunan marep ring kabupaten Desa/Banjar;
- ca. polih tanding tengah;
- ra. polih pah-pahan upon-upon palaba carik/tegal druwen Desa;
- ka. patias sewosan manut pararem.

Pawos 18

- (1) Prajuru/Dulun Desa kapilih nyabran tigang warsa,ngawit saking padiwasane kaadegang Prajuru/Dulun Desa.
- (2) Prajuru/Dulun Desa sane swadharmannya sampun puputing senger, kengin kapilih malih.
- (3) Pariindikane ngadegang Prajuru/Dulun Desa sakaluwire,kapastika-
yang malarapan Paruman Krama Desa tur kaingkupin antuk Krama.
- (4) Wusan dados Prajuru/Dulun Desa,sangkaning :
 - ha. lina;
 - na. pinunas ngraga malantaran jalaran sane pastika;
 - ca. swadharmannya sampun puputing senger;
 - ra. kawusanang utawi kanorayang olih Krama Desa duaning iwang pamargi,menawi nilar sesana;
 - ka. balu.
- (5) Ngentosin,ngwusanang utawi nganorayang Prajuru/Dulun Desa,
patut kamargiang sajeroning Paruman Krama Desa tur kaingkupin
antuk Krama Desa.

Palet 3

Indik Kulkul

Pawos 19

- (1) Dudonan Kulkul ring Desa Adat Bangkyang Jaran,luwire :
 - ha. Kulkul Desa;
 - na. Kulkul Banjar;
 - ca. Kulkul Sekaa-sekaa.
- (2) Kulkul Desa/Banjar,kamanggehang pinaka piranti utawi sarana te-
ngeran maka wangsit,ring wewengkon wewidangan Desa/Banjar.
- (3) Tetepakan suaran kulkul manut dresta,tur anggah-ungguh tetepak-
anipun kaunggehang jeroning Pararem.

Pawos 20

- (1) Kulkul Desa/Banjar,tan wenang katepak yan tan sangkaning pitu-
duh Prajuru,sajawaning tengeran kapancabhayan.
- (2) Sang nepak Kulkul Desa/Banjar tan sangkaning pituduh Prajuru,
patut digelis atur supeksa maka buatan panepake;yan piwal,sang
mamurug wenang katibakin danda,manut pararem.

- (3) Kulkul Sekaa-sekaa miwah kulkul pondokan-pondokan, tan kalugra nyawerin minakadi matchin sukat miwah tetepakan Kulkul Desa/ Banjar; prade mamurug, sang mamurug taler wenang katibakin danda, manut pararem.
- (4) Suaran kulkul tengeran ngayah, patut katedunin antuk Krama, manut daging dedawuhan utawi arah-arah.
- (5) Suaran kulkul tengeran kapancabhayan, patut katedunin antuk Krama Lanang Ngarep miwah warga truna saha makta gegawan pamitulung, manut rupan bhaya.

Palet 4

Indik Paruman

Pawos 21

- (1) Dudonan Paruman ring Desa Adat Bangkyang Jaram, luwire :
 - ha. Paruman Krama Desa kawentenang nangken warsa, sane karihinin antuk tetibak arah-arah.
 - na. Paruman Padgatakala, rehning wenten indik sane dahat mabuat sane pacang kabawosang, sane karihinin antuk tetibak arah-arah.
 - ca. Paruman Prajuru/Dulun Desa, kawentenang manut kabuatan.
 - ra. Paruman Sekaa-sekaa, kawentenang manut kabuatan.
 - ka. Paruman Tempekan, kawentenang manut kabuatan.
- (2) Pamargin Paruman Krama Desa, patut nganutin dudonan :
 - ha. Paruman wahu kengin kakawitin sasampune katedunin antuk pinih kedik atenga lintang saking sang patut ngwiletin peparuman, kamanggala antuk tengeran suaran kulkul, mabusana adat Bali, tan kalugra makta gegawan sakaluwire, karihinin antuk ngarcana Bhagawan Panyarikan majalaran widhi widhana lan cane.
 - na. Maka pangawit kalaksanayang panyacak pangesep, karuntutin antuk nyacak dedosan, wahu kalanturang antuk parum.
 - ca. Sasampun parumane puput, patut kacacak malih, tur sane kasep, sang ninggal paruman miwah sane nosa, wenang katibakin danda, sane ageng alitipun, kasulurang manut pararem.
 - ra. Maka pamastika wahu kengin nyacak pangesep, kasulurang manut pararem.
 - ka. Sajeroning paruman tan kalugra ngwetuang wak ghora minakadi ngardi biota; sang mamurug, wenang keni pamidanda bea pacamil, sakadi dandaning wang anguman-uman ring paseban, sane kasulurang manut pararem.
 - da. Pamutus bebawos sane briuk sapanggul utawi ingkup, punika sane kaaptiang tur kamanggehang, bilih nenten mrasidayang, bebawose sane makehan sinanggeh pamutus bebawos.
- (3). Prade daging peparumane nenten kaingkupin, Prajuru Desa mangda ngilikang bebawos, saha pamutusnya mangda kararemin antuk Krama Desa, bilih jantos ping tiga nenten kaingkupin, Prajuru Desa da-

dos nunas bawos ring Kreta Desa, pinih untat malih katunasang pamutus sajeroning Paruman Krama Desa, bilih taler nenten ka- ingkupan, Prajuru Desa dados nunasang ring Guru Wisesa.

Pawos 22

- (1) Sajeroning Paruman Krama Desa, Bendesa Adat patut nyiarang pamargin ngenterang Desa Adat, pamekas ngeninin indik :
 - ha. Munjuk lungsuring gebogan krama saha ayah-ayahnyane, indik panelas, minakadi indik sulur arthabrana druwen Desa.
 - na. Pamargin Utsahan Desa sane mabuat.
 - ca. Sahanan wicara lan pamutus-pamutusnya.
 - ra. Pangrencanan Prajuru, ngeninin utsahan Desane kapungkur.
- (2) Pamutus Paruman Krama Desa sane sinanggeh Pararem, kamanggehang maka pamitegep panglaksanaan awig-awig.

Pawos 23

- (1) Paruman Prajuru/Dulun Desa, kawenangang wantah ngrincikang pangrencana marep ring utsahan Desane kapungkur.
- (2) Paruman Prajuru Desa, tan kawenangang ngamedakang tetegenan ring Krama Desa, saderenge kaingkupan antuk Krama Desa.
- (3) Pamutus Paruman Prajuru/Dulun Desa, kengin ngwetuang pasuara manut daging pituduh sang ngawa rat, utawi ngonekang pamutus sane pecak sampun dados Pararem Krama Desa.

Palet 5

Indik Druwen Desa

Pawos 24

- (1) Sane kamanggehang dados druwen Desa Adat Bangkyang Jaran, luwire :
 - ha. Kahyangan Desa, luwire :
 - 1). Kahyangan Tiga : Pura Desa, Pura Puseh, Pura Dalem.
 - 2). Kahyangan druwen Desa sewosan ring Kahyangan Tiga, luwire : Mrajapati, Palinggih Bale Banjar, Pura Pasimpangan Pucak Rangda/Pura Subak, Palinggih Tanggun Desa, Pura Luhur Pucak Rangda.
 - na. Bale Desa Adat.
 - ca. Palaba Pura marupa tegal, linggahipun 9,280 Ha, pipil nomor : 348/740.
 - ra. Setra.
 - ka. Niasa lan Sesanti.
 - da. Lekita-lekita mabuat : pipil utawi sertipikat, awig-awig, pasuara, pararem.
 - ta. Lelangwan, ilen-ilen lan pamitegep Kahyangan Desa, luwire :
 - 1). Gong.
 - 2). Pratima-pratima, pangawin, kampuh, tedung.

- (2) Olih-olihan Desa Adat Bangkyang Jaran, mawit saking :
- ha. Upon-upon palaba pura.
 - na. Paturunan saking Krama Desa.
 - ca. Pamogpog utawi Pananjung Batu.
 - ra. Paica saking Guru Wisesa.
 - ka. Dana punia tiyosan sane patut.
- (3) Sanangken Paruman Krama Desa, Bendesa Adat patut nyiarang munjuk lungsur upon-upon palaba pura lan sapanunggalannya sane sinanggeh druwen Desa.
- (4) Upon-upon palaba pura lan sapanunggalannya, kanggen prabea piodalan miwah wewangunan ring pura, taler prabea tiosan marep ring kabuatan Desa Adat.
- (5) Sakaluwiring druwen Desa patut wenten lekitannya sane pastika.
- (6) Tan kalugra ngadol utawi ngesahang druwen Desa yan tan kacumponin antuk Krama Desa sami.

Palet 6

Sukerta Pamitegep

Kaping 1

Karang, Tegal lan Carik

Pawos 25

- (1) Krama Desa sane ngamong karang Desa utawi karang pumahan ngraga, patut ngwatesin karangnya sowang-sowang antuk pagehan utawi tembok, mangda pakantenannya asri.
- (2) Watese sane mawasta gegaleng kaluan miwah gegaleng kateben mangda nganutin dresta, tur kakaryanin olih sang negen wates inucap.
- (3) Prade karasayang pagehan inucap nglikadin, yan pada arsa panyandinge, watese kengin nganggen pinget utawi praciha pal saking Agraria, sakewanten kasaksi antuk Prajuru Desa/Banjar.
- (4) Prade wenten karang kabebeng, mangda kautsahayang wenten pamesuannya sane pastika.
- (5) Sowang-sowang tlajakan patut kapiara olih krama sane nlajak.
- (6) Taru miwah woh-wohan sane wenten ring tlajakan inucap, kadruwenang olih krama sane negen tlajakan punika.
- (7) Margi utawi gang druwen Desa Adat, linggahipun pinih kedik kalih meter.

Pawos 26

- (1) Sinalih tunggil Krama Desa/Krama Banjar, nenten kalugra :
- ha. ngalah-alah margi, pakarangan, tegal/carik krama sewosan.
 - na. ngalah-alah tegal kahyangan, setra, lan sakancan tegak sane sinanggeh suci.

- (2) Prade wenten mamurug kecape ring ajeng, sang mamurug, patut ngwaliang tanah inucap, tur sang ngalah-alah tegak suci, tiosan ring ngwaliang tanah tegak suci inucap, taler patut karuntutin antuk dewa danda miwah artha danda, sane kasulurang manut pararem.

Pawos 27

Indik Sukertan Pakarangan :

- (1) Tan wenang nanem utawi nunjel awak-awakan sawa ring karang paumahan.
- (2) Tan wenang makta minakadi ngenahang bebaktan saka luwire sane sinanggeh ngletihin karang paumahan bilih-bilih nglimbak jantos ngletihin karang paumahan anak liyan, miwah Desa Pakraman, manut kecap sastra agama.
- (3) Taler tan kalugra ngutang luhu ring kekalen utawi ring pakarangan krama liyan.
- (4) Taler tan kalugra makarya lolosan pangutangan toya ka pakarangan panyandinge.

Pawos 28

Indik Ngentasang Sawa :

- (1) Ngentasang sawa patut ngamarginin pamedalan sane mula patut dados pamargin sawa, yadiastun wenten pamedalan sewosan.
- (2) Ngentasang sawa ring tegal utawi carik anak lian, patut satinut ring pituduh Prajuru Desa Adat utawi Prajuru Subak.
- (3) Indik tata titine ngentasang sawa ring tegal utawi carik anak lian, kasulurang sakadi ring sor puniki :
 - ka. Tanah sane kamarginin (Pawos 27 (2) ring ajeng), patut ka-prayascita antuk sang maderbe sawa, tur kamargiang ring ta-nahe sane kaentap pinih rihia, salanturipun tanah sane ka-marginin ungkuran, patut kasiratin tirta prayascita kewanten.
 - na. Ngentasang sawa ring pangkung, tukad, telabah, sang maderbe sawa tan sandang ngwentenang pamrayascita ring genahe sane kamarginin.

Pawos 29

Indik Padem ring Karang Anak Lian :

- (1) Yening wenten jadna padem ring karang paumahan, tegal utawi carik anak lian, genah punika patut katibakan upakara pamrayascita/panyapsap olih sang maderbe sawa nganutin pituduh sang maderbe karang, manut pararem Krama Desa, dresta, miwah kecap sastra agama.
- (2) Yening wenten sawa lan barang lianan sane sinanggeh ngletihin manut sastra agama sakewanten tan majanten sang nruwenang, patut kasangaskara olih Krama Desa tur pamastikan indik pangupahayun-nyane wahu kamargiang, sasampune polih lelugrahan saking Guru Wisesa.

Kaping 2

P e p a y o n a n

Pawos 30

- (1) Ngawit mandur pepayonan minakadi tanem tuwuh, patut adepa agung ngajeroang saking wates; pepayonan minakadi tanem tuwuh sane jantos ngliwat wates, wenang kasepatgantungin.
- (2) Pepayonan sane ngungkulin mawastu mayanin ka pisaga, sang nruwenang pepayonan inucap patut kawara tur kairing mapiguman antuk sang rumasa katetehan, bilih-bilih sang nruwenang arsa ngrebah utawi notor wit pepayonane punika.
- (3) Pradene sampun kawara taler tan wenten utsahan sang nruwenang, sang rumasa katetehan wenang masadok ring Prajuru, tur risampune kaparitasas kandugi wenten lelugrahan Prajuru, wahu wit pepayonane punika kengin karebah, sakewanten panukun patin wit pepayonane punika patut katahur olih sang rumasa ketetehan manut panglokikan sang nepasin, tur wit pepayonane sane karebah punika, kasuk - serahang ring sang nruwenang.
- (4) Sang patut keni pamidanda panyangaskara saha prabea manut param, marep ring wewangunan sang karubuhan, luwire :
ha. sang nruwenang wit pepayonan sane sinanggeh mayanin, pradene pungkut tur ngrubuhin wewangunan krama tiosan;
na. sang notor, monggol utawi ngrebah taru, tur ngrubuhin wewangunan krama tiosan.
- (5) Krama Desa patut ngamanggehang kawredian tanem tuwuh sane ngawinang Desane asri tur lestari sane kawastanin Bhuta Hita sane mateges kalestarian lingkungan hidup.
- (6) Sinalih tunggil krama sane pacang ngrebah pepayonan minakadi tanem tuwuh sane ngawinang Desane asri tur lestari, patut masadok ring Prajuru.

Kaping 3

W e w a n g u n a n

Pawos 31

- (1) Nyabran ngwangun, sowang-sowang krama patut :
ha. masadok ring Prajuru, pamakas marep ring wewangunan sane mayaitan minakadi menengin wates;
na. ngangge gegulak Asta Bumi miwah Asta Kosali, sanistannya manut ring patitise ka niskala.
- (2) Prade wewangunane jantos nyayubin ka pisaga, bilih-bilih temboka ring telenging wates, risampune kawara tur kairing mapiguman taler tan wenten utsahan sang nruwenang, kangkat kasadokang ring Prajuru; sasampune kaparitasas tur wenten lelugrahan Prajuru, sang nruwenang wenang keni danda manut param tur cap patut karebah.

yanang abangan.

Kaping 4

Wewalungan

Pawos 32

- (1) Sakancan warga desa sane miara wewalungan : bawi, banteng, lan sakancan punika, mangda sayaga nitenin negul minakadi nglogor wewalungannya, mangda nenten ngrusak karang utawi pabianan krama tiosan, bilik-bilik jantos ngranjing ngletehin kahyangan.
- (2) Prade wenten wewalungan malubar utawi ngeleb tur ngrusak karang utawi pabianan krama sewosan, risampune kawara taler nenten wenten utsahan sang nruwenang, yan wewalungan punika malih ngrusak karang utawi pabianan krama sewosan, wewalungan inucap kengin kataban, tur sang nruwenang wenang katibakin danda ngwaliang panukun wit tetanduran sane karusak, saha nahur panebas pepiaran tetabanan, manut panglokikan Prajuru Desa/Banjar.
- (3) Wewalungan sane kataban, sakewanten sajeroning tigang rahina nenten kasulurang olih sang nruwenang, patut katutur ring Prajuru Desa.
- (4) Wewalungan sane padem jeroning tetabanan tan sangkaning ginawe, sang naban tan wenang ngarsayang panebas tetabanan ring sapa sira ugi, taler sang nruwenang wewalungan inucap tan wenang ngarsayang pangentos wewalungan punika ring sapa sira ugi.
- (5) Sultur ayam, itik lan sakancan punika sane ngrusak tetanduran krama liyan, pateh ring wewalungan suku pat.
- (6) Wewalungan sane keni bhaya minakadi padem ring pakarangan krama sewosan boya sangkaning pakardin sang nruwenang karang, kasulurang manut pararem.
- (7) Tata carane malungguhang, naban miwah nebus wewalungan, mangda majalaran panguning miwah pituduh Prajuru.
- (8) Prade wenten wewalungan ngranjing jantos ngletehin genah suci, minakadi kahyangan, pamrajan lan sakancan punika, ri sampun kaparitatas antuk Prajuru, sang nruwenang wewalungan inucap wenang keni dewa danda lan artha danda, agung alitipun manut kecap sasatra agana, sane kapikukuh antuk Krama Desa.
- (9) Krama Desa patut nyerayanin wewalungan miwah sarwa prani pinaka sinalih tunggil utsahan Krama Desa ngardi Bhuta Hita, minakadi :
 ka. Ring alas sane wenten ring sawewengkon Desa Adat Bangkyang Jaran, nenten kadadosang maboros, mademang kidang, sata wana utawi keker, bojog, ijah lan sakancan punika, miwah ngrebah taru.
 na. Ring tukad utawi pangkung sane wenten ring sawewengkon Desa Adat Bangkyang Jaran, nenten kadadosang nuba ulam, nyetrum lan sakancan punika.
- (10) Sang mamurug kecape ring ajeng, wenang keni danda manut pararem.

Kaping 5

Indik Bhaya

Pawos 33

- (1) Bacakan bhaya luwire : jiwabhaya, arthabhaya, agnibhaya, toyabhaya, lindubhaya, lsp. sane ketahipun kawastanin Pancabhaya.
- (2) Sinalih tunggil krama sane manggihin ciri-ciri pastika wentene sahanan Pancabhaya, patut digelis nepak kulkul tengeran kapanca-bhayan, tur digelis atur supeksa ring Prajuru.
- (3) Prade Desane kahanan jiwabhaya, Krama Desane patut ngaturang upacara pamahayun Desa manut kecap sastra agama sane kapikukuh antuk krama, tur sang ngwetuang jiwabhaya, katur ring sang ngawawenang.

Pawos 34

- (1) Sinalih tunggil krama sane manggihin prasihna pastika wentene arthabhaya (kamalingan; kabaak), patut digelis nepak kulkul tengeran pamitulung manut pawos 20 (5); sang kamalingan patut digelis atur supeksa ring Prajuru; sang kacihnane ngamaling, katur ring sang ngawawenang, maweweh malih patut keni desa danda lan arthadanda manut pararem, yanipun ngamaling barang druwen Desa sane sinanggeh suci.
- (2) Sowang-sowang Krama Desa tan kapatut mapailonan ring dusta; sang kacihnane mapailonan ring dusta patut katibakin danda kadi dandaning maling, sane kasulurang manut pararem.
- (3) Indik ngrereh reramon minakadi daun kelapa, ron, miwah sane sewosan ring pabianan krama tiosan ri kenjekan suwung, kasulurang manut pararem.
- (4) Indik ngranjingin pakubon utawi pakarangan krama sewosan rikala suwung, mawastu raris sang maderbe pakubon utawi pakarangan kaicalan, kasulurang manut pararem.
- (5) Indik ngranjingin pakubon utawi pakarangan krama, sewosan rikala suwung riantukan wenten pisarat sane mabuat, minakadi mapangarah miwah kabuatan sane lianan, kasulurang manut pararem.

Pawos 35

Tata Cara Maseserep :

- (1) Sapa sira ugi Krama Desa sane kaicalan/kamalingan, patut atur supeksa ring Prajuru minakadi ring Guru Wisesa.
- (2) Krama Desa sane kaicalan/kamalingan, prade pacang maseserep, pinih rihin patut nunas kabebasan ring Prajuru/Guru Wisesa.
- (3) Prade genah maseserep punika nglangkungi desa sewosan, patut nunas kabebasan saking Bendesa Adate irika sapanguning Guru Wisesa.

- 4) Bendesa Adat inucap nuli ngicen panuntun mangda tata carane maseserep manut ring drestane irika.
- 5) Sahananing warga desa prade polih nuduk barang sakaluwire, patut atur supekse ring Bendesa Adat.
- 6) Bendesa Adat raris nyiarang barang dedudukan punika mangda sang nruwenang mawali prasida ngeniang barangnyane, tur sang mariangken patut makta pracihna pastika, mungwing barange punika mula wantak padruweannya.
- 7) Prade sampun tigang sasih sakewanten taler tan wenten jadma sane mariangken, barang punika wenang kadruwenang olih sang nuduk, sasampune polih lelugrahan saking sang ngawawenang.

Kaping 6

Panyanggran Krama Desa

Pawos 36

- 1) Krama Desa Adat Bangkyang Jaran patut sareng nyanggra karya suka-dukan sowang-sowang Krama Desa.
- 2) Tetibak panyanggrane marep ring Krama Desa sajeroning nyanggra karya suka-duka punika, kasulurang manut pararem.
- 3) Sowang-sowang Krama Desa sane pacang nangun karya suka-duka sane mabuat, mangda masadok ring Prajuru.

CATURTHAS SARGAH

SUKERTAN TATA AGAMA

Palet 1

Indik Dewa Yajnya

Pawos 37

- 1) Kahyangan-kahyangan panyiwian Krama Desa Adat Bangkyang Jaran, luwire :
 - ka. Kahyangan Tiga : Pura Desa/Baleagung, Pura Puseh, Pura Dalem.
 - na. Sewosan ring Kahyangan Tiga : Mrajapati, Palinggih Pempatan, Palinggih Bale Banjar, Palinggih Tanggun Desa, Pura Pasimpangan Pucak Rangda, Pura Luhur Pucak Rangda.
- 2) Tegak piodalan ring sowang-sowang kahyangan inucap ring ajeng, kamanggehang sakadi ring sor puniki :
 - ka. Pura Desa/Baleagung, Pura Puseh : ring rahina Buda, Wage, Menail.
 - na. Pura Dalem, Mrajapati, Palinggih Sapu Jagat : ring rahina Anggara Kasih Julungwangi.
 - ca. Pura Pasimpangan Pucak Rangda, ring rahina Buda, Umanis, Perangbakat.
 - ra. Pura Luhur Pucak Rangda : ring rahina Saniscara, Kliwon, Kuningan.

ka. Palinggih Bale Banjar lan Gong : ring rahina Saniscara,
Kliwon, Wayang.

- 3) Pamargin pangacine ring sowang-sowang kahyangan inucap ring ajeng, manut kecap sastra agama, saka kalaksanayang kanista, madhyama, utama, manut kawenten krama sane kaingkupin jeroning paruman Krama Desa.

Pawos 38

- (1) Ring sowang-sowang pura inucap ring ajeng, patut kaadegang Pamangku, Panyade, Serati lan Sutri.
- (2) Pidaabade ngadegang Pamangku, Panyade, Serati lan Sutri, luwire :
ha. ngwilang saking turunan utawi ngwaris;
na. malantaran nyanjan utawi nuhur ring pura sane karerehang Pamangku;
ca. malantaran kapilih antuk Krama Desa.
- (3) Sang tan wenang kaadegang dados Pamangku, luwire :
ha. cedangga, luwire : peceng, perot, cungh lan sapanunggilannya;
na. sapa sira ugi sane nenten kapatutang manut pararem;
ca. nandang sakit ila, ayan, buduh miwah pinungkan sane tan keneng tinamban;
ra. sang maderbe parilaksana nenten becik;
ka. sang polih macoran;
da. sang tan uning masastra.
- (4) Prabean upakara/upacara adiksa widhi utawi ngwintenang Pamangku, Panyade, Serati lan Sutri, kamedalin miwah kalaksanayang olih Krama Desa, manut pararem.
- (5) Marep ring prabean pitra yajnya ring Pamangku, Panyade, Serati lan Sutri, yan seda ri wekas, tiosan ring kamedalin antuk kulawarga, Krama Desane taler patut maweh dana punia atiwa-atiwa, manut pararem.
- (6) Pamangku kengin karombo antuk Panyade wantah adiri.
- (7) Pamangku, patut ngamanggehang sesana miwah agem-ageman Pamangku, luwire : tan kengin ajejuden, madon, madat, maling, lan salankancan punika.

Pawos 39

- (1) Swadharman Pamangku lan Panyade, luwire :
ha. ngenterang upacara piodalan ring kahyangan sane kaempon utawi ring pakubon sowang-sowang krama;
na. prade sinalih tunggil Pamangku Kahyangan Desa kapialang utawi cuntaka, kengin nyelang Pamangku Kahyangan Desa tiosan, utawi nuhur sang sulinggih, katitenin antuk Prajuru;
ca. yan Pamangku kalayusekaran, wenang anglepas swadharma, kasulurang manut pararem;

ra. Pamangku tan wenang salab-sulub, yan mamurug, Pamangku inucap wenang nyepuhin raga;

ka. yan Pamangku sampun tigang rahina ngayah ring pura sane kameron, kancit wenten kulawargannya kalayusekaran, Pamangku inucap tan keneng cuntaka, sakewanten nenten kengin budal salamin pidalan.

(2) Swadharmaning Serati Banten ring Desa, luwire :

ha. ngenterang Krama Desa sajeroning midabdabin upakara yajnyan desa, sane taler karombo antuk Panyade miwah Prajuru;

na. nyanggra Pamangku sajeroning ngilenang upacara yajnyan desa, sane taler kasanggra antuk Saya.

ca. miwah sane sewosan sane wenten pakilitipun ring pidabdab ngilenang upacara yajnyan desa;

ra. para Serati tan mari patut ngamanggehang kasucian sikian;

ka. sajeroning nanding banten patut madasar antuk plutuk banten.

Pawos 40

patias utawi olih-olihan Pamangku, Panyade, Serati lan Sutri, kadudonang manut :

(1) Olih-olihan sarin panahuran :

ha. 3 (tiga) ka Pamangku;

na. 2 (kalih) Serati;

ca. 2 (kalih) Sutri;

ra. 2 (kalih) Panyade;

ka. 3 (tiga) ka Banjar.

(2) Olih-olihan wusan upacara Dewa Yajnya (surudan), ulu suku pat, ka Pamangku, pala kiwa ka Serati lan Sutri.

(3) Olih-olihan sewosan kasulurang manut pararem.

Pawos 41

(1) Pamangku kagentosin, riantukan :

ha. seda;

na. pinunas ngraga, menawi kageringan lan sapanunggilannya;

ca. kawusanang antuk Krama riantukan nilar sesanan Pamangku, minakadi ngamargiang laksana asta dusta.

(2) Prade Pamangku kawusanang malantaran ngamargiang laksana asta dusta, patut keni danda manut pararem saha ngwaliang prabean pawintenane pecak.

Pawos 42

Indik Kasukertan Kahyangan, kadudonang sakadi ring sor puniki :

(1) Sane nenten kalugra ngranjing ka Kahyangan, luwire :

ha. sang katiban cuntaka manut pawos 50.

na. makta sahananing bebaktan sane sinanggeh ngletihin, manut kecap sastra agama;

ca. sato agung, sajawaning rikala mapepada;

- ra. mabusana tan manut tatacaraning busana ngranjing ka pura;
 ka. sadereng polih wak-wakan saking Prajuru.
- 2) Tata busanane ngranjing ka pura, kasulurang manut pararem.
 - 3) Pratingkahe tan wenang ring pura, luwire :
 - ka. masumpah utawi macoran, sajawaning pituduh Prajuru;
 - na. ngamedalang wak parusia utawi wak capala;
 - ca. mabanyu, makoratan, masesenengan, makolem dados asiki lanang wadon, nyangsang busana;
 - ra. ngias raga minakadi menahang wastra, menahang pusungan, lan sakancan punika, sajawaning sang sulinggih miwah pinandita.
 - 4) Sewosan ring Pamangku tan kalugra munggah tedun ring palinggih-palinggih, sajawaning wit saking pituduh Prajuru Desa.
 - 5) Sang mamurug kecape ring ajeng, wenang keni dewa danda, manut pamutus pararem.

jadm

Pawos 43

- 1) Yan wenten karawuhan ring pura boya sangkaning nyanjan, bilih-bilih ngwetuang biota, wenang keni dewa danda lan artha danda, sane kasulurang manut pararem.
- 2) Prade Kahyangan Desane kahanan durmanggala minakadi kapancabha-yan, Pamangku patut digelis masadok ring Prajuru Desa.
- 3) Indik upakara/upacara pamahayun kadurmanggala Kahyangan Desa, mapagamel kecap sastra agama, sane kasungkemin olih Krama Desa.

Palet 2

Indik Resi Yajnya

Pawos 44

- 1) Sang pacang madeg sulinggih utawi madwijati, patut masadok ring Prajuru Desa miwah Parisada Hindu Dharma Indonesia.
- 2) Prajuru Desa patut sareng ngawas lan nitenin tur wenang mialang-in, prade kacihnaw wenten indik sane tan manut kecap sastra agama, tur sareng nyaksi upacara padwijatiannya, saha ngilantur nyiarang jeroning Paruman Desa tegap rawuhing wates kawenangannya muput yajnya.
- 3) Krama Desane patut sareng madana punia sapamadeg miwah ring pang-lebar sang sulinggih ri wekas, katuntun antuk Prajuru Desa.
- 4) Sang Sulinggih wenang polih leluputan ayahan miwah peson-peson.

Pawos 45

- 1) Sang pacang mawinten maka buatan ngamangkunin, nyonteng, kabayan, dalang lan sakancan punika sane pacang ngenterang minakadi ngantebang yajnya, patut masadok ring Prajuru Desa.
- 2) Prajuru Desa patut sareng ngawas lan nitenin tur wenang mialang-in, prade kacihnaw wenten indik sane tan manut kecap sastra agama, tur sareng nyaksi upacara pawintenannya, saha ngilantur nyiarang

jeroning Paruman Krama Desa tegap rawuhing kawenangannya muput yajnya.

Pawos 46

- 1) Sajeroning muput yajnya, Sang Sulinggih sane inucap ring pawos 44 (1) ring ajeng, patut ngutamayang muput yajnya ring wewengkon Desa Adat Bangkyang Jaran, sasampune puput, wahu muput yajnya ring wewengkon Desa tiosan utawi ka dura desa.
- 2) Krama Desane sami patut sareng ngawas lan nitenin katuntun antuk Prajuru, mangda sahanan yajnya sane kalaksanayang olih sowang-sowang Krama Desa, sane kapuput olih Sang Sulinggih utawi Pinandita, manut kawenangannya sowang-sowang.

Palet 3

Indik Pitra Yajnya

Pawos 47

- 1) Sajeroning nyanggra pamargin Pitra Yajnya, Desa Adat Bangkyang Jaran, mapagamel kecap sastra agama kaanutang ring Drestan Desa.
- 2) Krama Desa Adat Bangkyang Jaran patut sareng nyanggra yan wenten sinalih tunggil krama, sane nglaksanayang Pitra Yajnya.
- 3) Tata cara panyanggrane ring ajeng, kasulurang manut pararem.
- 4) Dudonan pamargin Pitra Yajnya :
 - ha. majalaran mendem utawi ngeseng, maka cihna makingsan ring Prethiwi utawi makingsan ring Geni, pinaka dharana antos nuptupang prabea;
 - na. majalaran upacara pangabenan utawi palebon;
 - ca. riwusan ngaben, patut kalanturang malih antuk upacara memukur tur karantutin malih antuk nglinggihang dewa pitara.

Pawos 48

- 1) Sinalih tunggil krama sane kalayusekaran/atiwa-atiwa, mangda masadok ring Prajuru.
- 2) Swadharman Krama Desa/Krama Banjar salanturnya :
 - ha. Bendesa Adat/Kelihan Adat patut maritatas sang kaduhkitan, napike pacang kapendem, makingsan ring Geni, utawi lantur kaabenang.
 - na. Prade kapendem, raris kawentenang panepak kulkul tengeran kalayusekaran.
 - ca. Panyanggran krama salanturnya, manut sakadi sane sampun kaunggahang jeroning pararem, jantos pependemane puput.
 - ra. Prade makingsan ring Geni, panyanggran krama salanturnya, manut sakadi daging pararem, jantos pamargin upacarane puput.
 - ka. Prade kaabenang, panyanggran krama salanturnya manut sakadi daging pararem, jantos pamargin upacarane puput.

- 1) Tan kalugra nginepang bangbang.
- 2) Desane maweh galah ring sang kalayusekaran sajeroning pitung rahina kengin atiwa-tiwa, sajawaning wenten kabuatan tios saking sang yajamana.
- 3) Larangan pependeman miwah palebon ring wewengkon Desa Adat Bangkyang Jaran, kaunggahang jeroning pararem.
- 4) Sawan wong rare sane durung mayusa tigang sasih, patut kapendem pramangkin tan ngetang padewasan ring setra bebajangan tur tan kengin kaabenang.
- 5) Sawan wong rare sane durung maketus untu, kengin kaabenang jantos ngelungah kewanen.
- 6) Sajeroning arahina yan wenten sang pacang mendem sawa lintangan ring adiri ring setra tunggal, sawane sane pinih tampek ring setra sane patut kamargiang rihinan.
- 7) Sajeroning arahina yan wenten sang pacang mendem sawa miwah ngaben, pependemane sane patut kamargiang rihinan, wahu karuntutin antuk ngamargiang ilen-ilen pangabenan.
- 8) Sawan sang nandang sakit ila dados ngranjing ka pakubonan tur patut kapendem ring wewidangan setra sane sampun pastika.
- 9) Sawan jadma salah pati, ngulah pati, dados ngranjing ka pakubonan sadurunge kapendem.

Pawos 49

- 1) Sawa sane boya mawit saking warga Desa Adat Bangkyang Jaran, prade kapendem ring setra sane wenten ring wewengkon Desa Adat Bangkyang Jaran, sang nruwenang sawa patut nahur panukun setra, sane agung alitipun kasulurang manut pararem.
- 2) Sapa sira ugi nenten kalugra mendem sawa utawi ngeseng sawa, sewosan ring setra utawi tunon.
- 3) Indik ngaben nangun, kasulurang manut pararem.
- 4) Peputusan pangabenan, kasulurang manut pararem.

Pawos 50

- 1) Desa Adat Bangkyang Jaran ngamanggehang indik cuntaka, mapagamel ring Pamutus Mahasabha Parisada Hindu Indonesia.
- 2) Tata carane nyulurang kacuntakan, mapagamel ring kecap sastra agama, kaanutang ring arestan desa, sane kaingkupin jeroning pararem.
- 3) Sinalih tunggil krama sane kahanan cuntaka, yan durung utas, tan kalugra nyarubin genah suci druwen Desa miwah druwen sowang-sowang krama.
- 4) Sang mamurug, patut keni dewa danda, manut pararem.
- 5) Sengker utas cuntaka manut kawentenannya, kasulurang sakadi ring sor puniki :

- ha. Kalayusekaran, cuntakannya kaanutang ring sastra miwah drestan desa.
- na. Ngrajaswala, cuntakannya tigang rahina ngawit saking ngrajaswala, utawi salamining ngrajaswala.
- ca. Ngembasang putra, abulan pitung rahina ngawit saking putrane embas marep ring sane istri, roras rahina marep ring sane lanang.
- ra. Karuron, cuntakannya abulan pitung rahina ngawit saking karuron, ngantos katiwakin tirtha pamrayascita.
- ka. Pawiwahan, cuntakannya jantos maupakara pabiakaonan/matirtha pabiakaonan, sesayut pakala-kalan.
- da. Gamia gamana, cuntakannya jantos sampun kapalasang, karuntutin antuk mrayascita sikian, Desa Adat miwah Kahyangan Desa.
- ta. Salah timpal, cuntakannya kapuputang manut kecap sastra agama miwah drestan desa.
- sa. Anak istri mobot sane nenten katiwakin upacara pabiakaonan, cuntakannya jantos katiwakin upacara pabiakaonan.
- wa. Anak istri ngembasang putra sane pecak nenten katiwakin upacara pabiakaonan miwah widhi widhana, cuntakannya jantos wnten meras anake alit, karuntutin antuk upacara manut kecap sastra agama.
- la. Sad atatayi, cuntakannya jantos sampun mrayascita sikian miwah ngesehin prawreti.
- na. Mamitra ngalang, cuntakannya jantos katiwakin upacara pabiakaonan.
- 6) Cuntaka kalayusekaran/kapademan :
- ha. Kapendem, cuntakannya :
- 1). cuntaka ka Desa Adat, laminipun tigang rahina ngawit saking wusan mendem, jantos sampun maprayascita;
 - 2). kulawargannya sajeroning pakarangan manut dresta.
- na. Kaabenang, cuntakannya :
- 1). cuntaka ka Desa Adat, manut dresta sane kapikukuh antuk pararem;
 - 2). Cuntakan sang nyambut karya pitra yajnya rawuhing kulawargannya, manut dresta sane kapikukuh antuk pararem.
- 7) Sang katiban cuntaka, luwire :
- ha. Kalayusekaran, sane cuntaka :
- 1). sang kalayusekaran rawuhing kulawargannya;
 - 2). Desa Adat.
- na. Ngrajaswala, sane cuntaka : sang ngrajaswala.
- ca. Ngembasang putra, sane cuntaka : sang maderbe putra, lanang miwah istri, utawi yayah renan sang wahu embas.
- ra. Pawiwahan, sane cuntaka : sang mawiwaha, lanang miwah istri.

- ka. Karuron, sane cuntaka : sang karuron rawuhing lanangnyane.
- la. Gamia gamana, sane cuntaka :
- 1). sang nglaksanayang gamia gamana punika;
 - 2). Desa Adatnyane.
- ta. Salah timpal, sane cuntaka :
- 1). sang nglaksanayang salah timpal;
 - 2). Desa Adatnyane.
- sa. Anak istri mobot sane nenten katiwakin upacara pabiakaonan, sane cuntaka : anake istri sane mobot punika.
- wa. Anak istri ngembasang putra sane pecak nenten katiwakin upacara pabiakaonan miwah widhi widhana, sane cuntaka :
- 1). sang ngembasang putra;
 - 2). putrane sane kaembasang.
- la. Mamitra ngalang, sane cuntaka : sang nglaksanayang mamitra ngalang punika.
- ma. Sad atatayi, sane cuntaka : sang nglaksanayang sad atatayi punika.
- (8) Sang tan keneng cuntaka :
- ha. Sang Sulinggih;
- na. Pamangku Kahyangan Tiga rikala piodalan ring pura, yan Pamangku sampun tigang rahina ngayah ring pura sane kaempon.
- (9) Yan wenten Krama Desa Adat ngwangun kahyangan, nenten kadadosang ngelarang atiwa-tiwa/pangabenan ring Desa Adat.

Palet 4

Indik Manusa Yajnya

Pawos 51

- (1) Manusa Yajnya, inggih punika upacara-upacara dharmaning kakuripan manusa, ngawit saking patemoning kama bang lan kama petak sajeroning garbha, jantos kalayusekaran ri wekas.
- (2) Krama Desa, patut sareng nyanggra miwah nitenin yan wenten sina-lih tunggil krama nglaksanayang upacara Manusa Yajnya sane mabuat.
- (3) Tata cara panyanggrane inucap ring ajeng kasulurang manut pararem.
- (4) Sang pacang nglaksanayang upacara Manusa Yajnya sane mabuat, mangga masadok ring Prajuru.
- (5) Upacara-upacara inucap ring ajeng kamargiang kanista, madhyama, utama, manut kecap sastra agama miwah dresta.

Palet 5

Indik Bhuta Yajnya

Pawos 52

- (1) Krama Desa patut sareng nyanggra pamargin Bhuta Yajnya, marep ring kabuatan Desa Adat Bangkyang Jaran.
- (2) Pidaadab pamargin Bhuta Yajnya inucap ring ajeng, mapagamel ring kecap sastra agama, kaanutang ring drestan Desa, sane kapikukuh antuk pararem.
- (3) Krama Desa patut sareng nyanggra yan wenten sinalih tunggil krama sane nglaksanayang Bhuta Yajnya sane mabuat.
- (4) Sang pacang nglaksanayang Bhuta Yajnya sane mabuat, mangda masadok ring Prajuru.

Pawos 53

- (1) Bhuta Yajnya marep ring kabuatan Desa Adat minakadi carun sasih miwah sane lianan kasulurang manut pararem.
- (2) Indik pamargin palelastian utawi makiyis, kasulurang manut pararem.
- (3) Nangken warsa, rikalaning Tilem Sasih Kasanga, Krama Desa patut nglaksanayang Tawur Kasanga miwah pacaruan ring sowang-sowang pakubon, kalanturang antuk pangrumpukan, pinaka cihna nyanggra pangrawuh Nawa Saka Warsa (Tahun Baru Saka) ring pananggal apisan Sasih Kadasa, sane kawastanin Nyepi.
- (4) Rikalaning Nyepi, sowang-sowang Krama Desa rawuhing kulawarga patut ngamargiang Catur Brata Panyepian, inggih punika :
 ha. amati geni : tan kengin maapi-api;
 na. amati karya : tan kengin nyambut karya;
 ca. amati lelangwan : tan kengin maoneng-onengan, ngwijilang su-
 ara ghora, nabuh gegambelan, lan sakancannya;
 ra. amati lelungan : tan kengin malelungayan mrika-mriki.
- (5) Catur Brata Panyepian punika kamargiang saking semeng jantos benjangne ngedas rahina.
- (6) Mangda pamargin Catur Brata Panyepian punika trepti, patut katilikin antuk tetelik Desa sane kawastanin Pacalang Desa, tur sang mamurug patut katiwakin pamidanda, sane kasulurang manut pararem.
- (7) Ring pananggal ping Kalih Sasih Kadasa, kawastanin Ngembak Geni, sowang-sowang krama patut saling ngaksamayang sane kawastanin Dharma Santi.

PAÑCAMAS SARGAH

SUKERTAN TATA PAWONGAN

palet 1

Indik Pawiwahan

Pawos 54

- (1) Krama Desa patut sareng nyanggra miwah nitenin sinalih tunggil krama sane nglaksanayang pawiwahan.
- (2) Pamargin Pawiwahan, luwire :
 - ha. malantaran pepadikan;
 - na. malantaran ngrorod utawi marangkat;
 - ca. malantaran nyentana utawi nyentana nyeburin.
- (3) Indik Pawiwahan, Desa Adat Bangkyang Jaran, ngamanggehang Undang-Undang Nomor 1 Tahun 1974, miwah Peraturan Pemerintah Nomor 9 Tahun 1975, indik Pawiwahan.
- (4) Tatacara panglaksanannya, mapagamel ring kecap sastra agama, kaanutang ring drestan desa, sane kapikukuh antuk pararem.
- (5) Sinalih tunggil krama sane pacang nglaksanayang pawiwahan, mangda masadok ring Prajuru.

Pawos 55

- (1) Pawiwahan sane kabawos patut ring Desa Adat Bangkyang Jaran, kamanggehang sakadi ring sor puniki :
 - ha. sang mawiwaha lanang istri sampun katiwakip upacara pakala-kalan utawi pasakapan tur kasaksi antuk tri upasaksi, inggih punika : manusa saksi, bhuta saksi miwah dewa saksi;
 - na. prade ngambil anak masewosan agama, mangda karihinin antuk upacara sudi wadani;
 - ca. Prajuru patut makelingang mangda pawiwahan punika kategepin malih antuk Likita Pawiwahan utawi Akte Perkawinan.
- (2) pawiwahan sane tan manut ring pidabdabe ring ajeng, sinanggeh pawiwahan tan pastika.

Palet 2

Indik Nyapihan

Pawos 56

- (1) Prajuru Desa wenang sareng mawosin miwah nitenin yan wenten sinalih tunggil krama sane mapikarsa pacang malas marabi, gumanti nenten kadurusan dados nyapihan.
- (2) Yan krama inucap kukuh ring pikarsannya, Desa Adat nenten sumakuta ring pamarginnya.
- (3) Saderenge pastika polih pamutus saking sang ngawawenang minakadi Sang Rumawos (Pengadilan Negeri), krama inucap manggeh keni tetegenan krama, sakadi nguni.

Palet 3

Indik Sentana

Pawos 57

- (1) Prajuru Desa wenang sareng mawosin miwah nitenin yan wenten sinalih tunggil krama sane ngindikang sentana.
- (2) Indik sentana, Desa Adat Bangkyang Jaran, ngamanggehang uger-uger jagat minakadi kawicaksanan sang maraga Guru Wisesa, kaanutang ring drestan desa.
- (3) Indik panglaksananipun, mapagamel kecap sastra agama, lan drestan desa, sane kapikukuh antuk pararem.
- (4) Sang pacang ngrajegang sentana, mangda masadok ring Prajuru.

Pawos 58

- (1) Sahanan krama sane ngerobang anak lian sane boya ngranjing paketan pakulawargannya, minakadi :
 ha. ngajak wong dedudukan;
 na. ngajak nyama luh palas mapikuren;
 ca. ngajak jadma masundulang dewek;
 ra. ngajak nyama muani sane mulih saking nyentana nyeburin;
 ka. miwah ngajak jadma sewosan malih, patut atur supeksa ring Bendesa Adat.
- (2) Atur supeksa sane inucap ring ajeng mangda kajangkepin antuk katerangan sane pastika ngeninin sulur arthabrana, lan tetegenan ayahan krama marep ring sang kaerobang punika.
- (3) Krama Desa sane ngerobang miwah sang kaerobang patut sareng sumakuta ngardi kasukertan Desa Adat.
- (4) Bendesa Adat raris ngenggahang atur supeksa punika ring Likita Krama Desa Adat Bangkyang Jaran, saha nyiarang jeroning Paruman Krama Desa.

Palet 4

Indik Warisan

Pawos 59

- (1) Prajuru Desa wenang sareng mawosin miwah nitenin yan wenten sinalih tunggil krama, sane ngindikang warisan.
- (2) Indik Warisan, Desa Adat Bangkyang Jaran, ngamanggehang uger-uger jagat minakadi kawicaksanan sang maraga Guru Wisesa, sane panglaksananipun kaanutang ring drestan desa, sane kapikukuh antuk pararem.
- (3) Sang pacang ngindikang warisan, mangda masadok ring Prajuru.

SASTHAMAS SARGAH

WICARA LAN PAMIDANDA

Palet 1

Indik Wicara

Pawos 60

- (1) Sane wenang mawosin wicara ring wewengkon Desa Adat Bangkyang Jaran, inggih punika Prajuru Desa maka miwah Dulun Desa, sane kawastanin Kerta Desa.
- (2) Prade sang mawicara tan cumpu ring Pamutus Kerta Desa, kengin nunasang ring Sang Rumawos utawi Pengadilan Negeri.
- (3) Sahanan wicara sane mawit saking kacorahan sakaluwire sane si-manggeh nungkasin daging awig-awig, pasuara miwah pararem Krama Desa, patut digelis kabawosin olih Prajuru, nenten nyantos pasadok malih.
- (4) Sajaba wicara sakadi ring ajeng, patut nyantosin pasadok sang nunas bawos.
- (5) Panepase mangda pastika nyantenang iwang patut malarapan Tri Pramana, inggih punika : saksi, likita, bukti, tur panepase tan maren nepek ring Catur Dresta.

Palet 2

Indik Pamidanda

Pawos 61

- (1) Desa Adat Bangkyang Jaran, wenang nibakang pamidanda ring warga Desa sane sisip.
- (2) Tetibak pamidanda inucap ring ajeng, kalaksanayang olih Prajuru.
- (3) Bacakan pamidanda, luwire :
 ha. ayahan panukun kasisipan;
 na. artha danda saha panikelnya, miwah panikel paturunan;
 ca. rerampagan;
 ra. kanorayang;
 ka. panyangaskara.
- (4) Pamidanda sane katiwakang patut masor singgih, manut kasisipan.
- (5) Jinah utawi arthabrana pamidanda, ngranjing dados druwen Desa Adat.

Pawos 62

- (1) Krama sane langkungan ring tigang paruman nglantur nenten nahur paturunan miwah dedandan, wenang karampag.
- (2) Tetibak rerampagan, nganutin tatacara sakadi ring sor puniki :
 ha. Kalaksanayang olih Prajuru, kasarengin antuk krama pinih akeh tigang diri, maka saksi.
 na. Sang ngrampag patut madarsana rikala ngambil barang minaka-di nyawenin tanem tuwuh, sane pangargannya manut ring utang sang karampag.
 ca. Prajuru patut miteketang mangda barang-barang sane karampag punika digelis katebus masenger awuku, tur ring kutus rahinane pacang kalelang utawi kaadol.

ra. Tan kengin ngrampag saluwiring barang sane patut inggilang manut kecap sastra agama, miwah mademang pangupajiwan sang karampag.

Pawos 63

- (1) Prade sang pacang karampag mialangin pamargin rerampagan inucap, mawastu sampun tan nganutin linging awig-awig, tan wenten pamargi sewos, sajawaning krama inucap kanorayang antuk Krama Desa.
- (2) Rerampagan inucap ring ajeng kabawos buntas, risampun sang keni rerampagan punika :
 ha. Nunas geng rena sinampura ring ajeng Krama Desa sami, riantukan piwal ring pasubaya sane pecak sampun kararemin.
 na. Nahur pangargan panguwak pasubaya duk pacang karampag, kadulurin antuk prayascita panyapsap kaiwangan ring Desa.

SAPTAMAS SARGAH

NGUWAH-UWUHHIN AWIG-AWIG

Pawos 64

- (1) Nguwah-uwuhin Awig-Awig Desa Adat puniki, wantah kengin kalak-nayang antuk Paruman Krama Desa.
- (2) Pakarsane nguwah-uwuhin punika, mangda mawit saking pakarsan Krama Desa, yadiastun kamedalang antuk sinalih tunggil Prajuru, utawi sinarengan.

Pawos 65

- (1) Sakaluwiring indik sane sampun kamargiang sadereng awig-awig puniki kasurat, mangda kaanutang ring daging awig-awig puniki.
- (2) Sakaluwir sane durung kasurat sajeroning awig-awig puniki, menawi kangkat kaanggen mitegepin awig-awig puniki, pacang kasurat jeroning Pararem.

ASTAMAS SARGAH

S A M A P T A

Pawos 66

- (1) Awig-awig puniki mawasta Awig-Awig Desa Adat Bangkyang Jaran.
- (2) Awig-awig puniki kamargiang ngawit kaingkupin utawi kararemin.

Pawos 67


- (1) Awig-awig puniki kararemin duk rahina Sukra Wage Wuku Warigadean Shrawana penanggal Ping 6 Caka 1922 (Tgl. 7 Juli Tahun 2000).

- (2) Awig-awig puniki kalinggatanganin antuk Bendesa Adat Bangkyang Jaran, miwah olih sang ngawawenang manut kawenangannya sowang-sowang, kapikukuh antuk Murdhaning Pamikukuh : Bupati Tabanan.
- (3) Register Nomor :


Luwingsang kalinggatanganin :
Bendesa Adat Bangkyang Jaran,
I WAYAN WIDIA

Saksi - saksi :


Kepala Dusun Bangkyang Jaran,
I KETUT SUTIRKA


Kepala Desa Lalanglinggah,
I KETUT LATERA


Kecamatan Selemadeg,
I WIDEREDA


Camat Selemadeg,
DRS. I KETUT DENIA

Kawikanin olih


Ketua BPDA Kabupaten Tabanan,
DRS. I WAYAN DJAPA


Kabupaten Tabanan,
MADE SAMBA


Pimpinan Kepala Kantor Departemen
Agama Kabupaten Tabanan,
DRS. I WAYAN SENATRA


MURDHANING PAMIKUKUH

BUPATI TABANAN,

N. ADI WIRYATAMA, BA

NIASA LAN SASANTI DESA ADAT BANGKYANG JARAN

- (1) Sibeh Bucu Lima, mateges : Desa Adat Bangkyang Jaran, mapikukuh antuk Pancasila, Dasar miwah Darsanan Jagat Republik Indonesia.
- (2) Swastika Jeroning Padma Asta Dala, mateges :
 ha. Swastika, mateges : Krama Desa Adat Bangkyang Jaran, nginggilang miwah nyungkemin Agama Hindu.
 na. Padma Asta Dala, Mateges : Krama Desa Adat Bangkyang Jaran, misinggihang asta aiswaryan Ida Sang Hyang Widhi : Anima, Laghima, Mahima, Prapti, Prakanya, Isitwa, Wasitwa, miwah Yatra-kamawasayitwa, tur sajeroning ngupadi patitis Desa Adat Bangkyang Jaran, Prajuru Desa Adat Bangkyang Jaran, mapagamel antuk Astra Brata : Indra Brata, Yama Brata, Surya Brata, Candra Brata, Bayu Brata, Kuwera Brata, Agni Brata, Baruna Brata.
- (3) Gunung, mateges : Palemahan Desa Adat Bangkyang Jaran magenah ring sampih kelod Bukit Randa.
- (4) Candi Bentar, mateges : Krama Desa Adat Bangkyang Jaran, tan mari ngamanggehang araddha bhakti, majeng ring Ida Sang Hyang Widhi.
- (5) Jaran Tetiga, mateges : sane ngalas wayahin Desa Adat Bangkyang Jaran puniki kamanggala sareng tigang diri : Nang Ramas, Nang Ritis, miwah Nang Remadi, kasarengin antuk pangabih malih pitung diri : Nang Rajeg, Nang Rinis, Nang Rayén, Nang Runteg, Pan Rugeh, Pan Sedang, miwah Nang Mutra.
- (6) Padi lan Kapas, mateges : sajeroning ngupadi Jagadhita, Krama Desa Adat Bangkyang Jaran tan mari nglimbakang bhoga miwah upabhoga.
- (7) Ante nem balung sambung sinambung, mateges : sajeroning miteledin miwah ngresepang daging-daging sastra agama, Krama Desa Adat Bangkyang Jaran, matiti pangancan antuk : Dharma Wacana, Dharma Tula, Dharma Gita, Dharma Sadhana, Dharma Yatra, miwah Dharma Santi.
- (8) sasanti : Jagadhita Ananta Winangun, mateges : sajeroning kahu-ripane sarahina-rahina, Krama Desa Adat tan mari mautsaha ngardi Jagadhita, sane matiti pangancan antuk Tri Purusa Artha, inggih punika : Dharma, Artha, Kama.

PANITIA PANYURATAN AWIG-AWIG DESA ADAT BANGKYANG JARAN

Ketua I : I Wayan Widia
 Ketua II : I Nengah Sularta
 Sekretaris : I Made Gede Tessa.
 Bendahara : I Wayan Yastawan
 Pembantu : I Made Wadra

Panitia Perumus :

Ketua I : I Made Sedana
 Ketua II : I Ketut Sutirka
 Anggota :

1. I Ketut Suparta
2. I Nyoman Landra
3. I Made Arya
4. I Ketut Suantra
5. I Ketut Wijana
6. I Wayan Suana
7. I Ketut Garadug
8. I Wayan Suardita
9. I Ketut Sudiana
10. I Nyoman Badri
11. I Ketut Wedra
12. I Wayan Telun
13. I Nyoman Mardana
14. I Wayan Suartika, SE.
15. I Made Sedana
16. I Ketut Riasadana athi.
17. I Wayan Jendun.
18. I Nyoman Wicana.
19. I Made Taniarsa, SE.